

Exxon lo yuda busca

Companionan petroquimico pa Aruba

ORANJESTAD(AAN)—Durante un conferencia di prensa ayera tardi, Sr. Betico Croes a duna di conoce cu actualmente tur hende ta den angustia pa loque ta bay pasa cu e refineria di Aruba.

El a reitera cu e prome escenario di compra y venta di e refineria no a ser bandona ainda y cu

gobierno ta den contacto cu dos grupo cu ta interesa den e refineria y cu ta progresando cu Exxon pa asina por yega na un arreglo cu por facilita un eventual venta.

El a bolbe ripiti di no kier crea expectativanan falso y tempo ta avanzando y corosion a cuminsa afecta e estado di e re-

fineria.

Pero tecnicamente ainda ta posibel cu e refineria por wordo re-apertura y cu ta den e tramitacion ey.

Diavierna ultimo a ricibi un carta di Exxon y aye- ra e comision cu ta negocia asuntonan respectu e refineria a reuni ariba proposicion y Sr. Betico

Croes ta kere cu den e siman aki lo haya datonan mas concreto di e dos companianan cu ta interesa.

Na mes instante ta preparando pa e escenario di desmantelacion. Esaki ta trece cune algun aspecto masha interesante y nobo cune, segun Sr. Betico Croes.

El a splica cu envista di

e claim ambiental cu tin y en bista ariba Exxon y en bista di e hehco cu

Exxon ta sinti un cierto obligacion moral pa cu loque nan a causa na economia di Aruba, cu Exxon ta compromete su

mes na yuda nos na haya algun planta petroquimica cu por crea centenares di cupo di trabao.

Ley Petrolero lo ser trata den parlamento na Januari

ORANJESTAD(AAN)—Durante e conferencia di prensa ayera tardi, Sr. Betico Croes a mustra cu e programa di MEP no ta cla ainda, pero cu e ta den concepto.

El a laga sa cu for di awor sin embargo a pidi gruponan multi disciplinario pa cuminsa prepara programa di gobierno pa 1986.

El a laga sa cu e mensahe cu el a duna na e grupo multi disciplinario ta cu pa MEP mescos cu a dedica nan mes den e ultimo añanan di dia y anochi ariba tereno estatal, lo bay dedica nan mes di dia y anochi, na trabao nan ariba tereno economico pa recupera e economia di Aruba.

El a laga sa cu MEP lo bin cu un plan ariba termino corto, mediano plazo y largo plazo.

"Naturalmente e prome actividadnan encuanto un estimulo, un empuhe den nos economia ta entorno di e desarrollonan, negociacionnan cu ta tumando lugar entorno e refineria. Sea ta otro grupo ta tume over of ta desmantelamento y e cooperacion di Exxon pa haya mas planta petroquimico y naturalmente e claim ambiental. Di otro banda nos den sector primario lo continua cu esfuertonan ariba tereno di agricultura, ganaderia y pesca. Naturalmente tin hopi hende cu ta esceptico ariba e asunto di agricultura y pesca, pero loque si mi ta kere, cu den

e sector primaria lo genera hopi actividad economico ta exploracion y explotacion di petroleo. E departamento petrolero a haya instruccion pa prepara pa e prome siman di januari, den parlamento

pasa e ley petrolero. Tur hende sa cu na momento cu e ley petrolero pasa, por bay over na actividadnan, organiza e sealbids unda ta haya hopi compania cu lo bay participa y lo ta menos cu algun

aña pasa, pero en todo caso e lo ta un cantidad substancial", el a laga sa.

Segun Sr. Betico Croes, cu e actividadnan, aunque cu e generacion di entrada y trabao mas bien lo ta despues di 5

pa 7 aña, desde principio

caba, ora ta trata di exploracion cu bo ta haya e plataformanan, tambe ta cuminsa cu un inicio di reactivacion di actividadnan economico.

Desarrollo positivo pa nos turismo e temporada aki

ORANJESTAD(AAN)—Durante ultimo simannan, varios contacto nobo a ser estableci den cuadro di promocion di industria di turismo di Aruba.

E companianan aerea America Airlines, y ALM a anuncia paquietenan favorable pa turistanan kendenan ta desea di bishita Aruba for di New York.

American Airlines a dicidi pa no aumenta su tarifa di pasashi pa Aruba durante e lunanan di invierno (winter) cu ta e temporada di turismo na Aruba.

Su tarifa di verano lo ser extende den High Season.

E suma involvi ta 279 dollar roundtrip New York-Aruba.

Kico esaki ta contene realmente pa e turista for di area di New York?

E turista por pasa un vacacion di un siman na Aruba cuminsando na 796 dollar cu ta inclui pasashi ida y vuelta, 7 anochi den hotel, 7 desayuno, 5 cena, botter di champaña den camber etc.

E noticia favorable aki a ser ricibi di Sr. Peter Dolara, encarga na American Airlines cu region di Caribe.

Tambe Sr. Dolara a tuma e iniciativa pa coordina un campaña di publicidad pa nos isla. Den e campaña cu lo costa 120 mil dollar lo participa American Airlines, gobierno di Aruba, AHATA, y Cavalcade Tours, cada un pa un suma di 30 mil dollar.

E compania ALM di su banda a anuncia cu entrante 27 di october venidero e lo introduci mas vuelo pa siman pa New

York, cu su avionnan DC-9 Super -80 cu un capacidad di 136 pasajero di cual 12 ta first class.

E vuelonan lo ta di Diahuebs pa dialuna Ariba Diahuebs e vuelo lo cubri ruta Bonaire-Aruba-Curacao-New York.

Diavierna y Diadomingo e vuelo lo ta New York-Curacao-Aruba-New York.

Diasabra e vuelo lo ta New York-Aruba-Curacao-New York y Dialuna New York-Aruba-Curacao-Bonaire.

E vuelonan nobo aki ta un expansion di asientonan disponibel pa nos isla for di New York.

Gerencia di ALM representa pa su presidente Patrick McNamara y vice presidente Juancho Anasagasti, a anuncia e noticia agradabel aki. Tambe nan a enfatiza e papel importante cu Aruba ta hunga den e red di vuelo di e compania.

E futuro relacion entre ALM y Aruba como destinacion turistico a keda discuti y e cooperacion pa futuro.

E informacionnan ricibi di American Airlines y ALM ta demostra cu e companianan menciona tin confianza den desarollo.

Segun servicio informativo di gobierno di Aruba, e labornan grandi cu gobierno di Aruba a haci durante ultimo añanan na bienestar di nos turismo ta cosechando su frutonan ya cu tanto localmente como internacionalmente hoteleronan y copanianan aerea ta kere den Aruba como un destinacion turistico pa nan clientenan.

Mas o menos 20 mil florin recauda pa Mexico

Cu show di mariachi

ORANJESTAD(AAN)—Segun informacionnan ricibi di Cruz Corra di Aruba, mas o menos 20 mil florin a ser recauda diasabra anochi cu e festival di mariachinan den RCA.

Directiva di Cruz Corra ta sumamente satisfecho cu e resultado di e show di mariachi, cual show a ser destina pa recauda fondo pa Mexico.

Cruz Corra ta gradici tur e mariachinan, duo Tommy y Francis, directiva di RCA, cu a pone e tereno disponibel pa e show, tur cantante, Sra. Lulu Croes y Shon Pa Kelly cu a percura pa e show, Colonne Commandant: Sr. Jean Beaz y Sra. Señora Pablo y Sra. Smith, y tur otro miembro di colonne cu a traha duro e anochi aki.

Tambe Sr. Ito Tromp kende a yuda anima e show hunto cu Lulu Croes.

Cruz Corra ta conciente di e problemanan financiero

Sigui lesa pg. 6